

RUT

(Rux)

Erimeré rü Moáanewa naxü ngímaxã ga naxmãx ga Noemí rü nanegü

1 ¹⁻²Rü yexguma Iraéanecüãxgümaxã inacuãxgügu ga yema ãëxgacügu ga guxchaxügiarü mexëëruügu ga Tupana nüxü unetaxü, rü ínangu ga taxü ga taiya ga guxüma ga yema naanewa. Rü yexgumaücüxü rü Yudáanewa nayexma ga wüxi ga yatü ga Erimerégu áégacü ga Beréüarü ñanegu áchiücü. Rü nüma ga Erimeré rü naxmãx ga Noemímaxã rü nanegü ga Maróü rü Querióümaxã Beréüwa inaxiãchi nax Moáanewa naxiüçax. Rü nümagü rü Efrátacüãx nixigü yerü Efráta nixi ga to ga naéga ga Beréü. Rü Moáanewa nangugü rü yexma nayaxãchiügu. ³Natürü nüma ga Erimeré ga Noemí ngíte rü yexma Moáanegu nayayu. Rü ngíma ga namãx ga Noemí rü ngíxicatama yéma iyaxü namaxã ga taxre ga ngíne. ⁴⁻⁵Rü yixcüamaxüirachigü rü nümagü ga yema taxre ga ngextüxcü rü Moáanecüãx ga ngexügümaxã nixãxmax. Rü wüxi rü Órfa nixi ga ngíéga, rü yema nai rü Rux nixi ga ngíéga. Natürü yexguma 10 ga taunecü ngupetüxguwena, rü nayue ta ga Maróü rü Querióü. Rü ngíma ga

Noemí rü ngíxica yéma itax, yerü marü nataxuma ga guma ngínegü rü ngíte.

Beréüwa ixí ga Noemí rü Rux

⁶Rü wüxi ga ngunexügu ga Noemí ga yexguma Moáanewa nayexmayane, rü nüxü ixínü ga guma ngírü ñane ga Beréüwa rü marü nax nataxuxüma ga taiya, yerü Tupana rü namaxã nixãüãchi. ⁷Rü yemacãx nagu irüxínü ga Yudáarü naanecãx nax natáeguxü. Rü ngíma rü ngíneãxgümaxã nawa íchoxü ga yema nachica ga nagu naxãchiüchiréxü ga Moáanewa nax ngíchiüane ga Yudáanewa naxüçax. ⁸⁻⁹Natürü ga namawa rü ngíneãxgüxü ngígürügü: —iÉcü pewoegu rü peéxütawa pexí! iRü Cori ya Tupana guxüguma mea pexü ngechaxü yema choxü rü chaunegüxü mea pengechaxüürüxü, rü pexü natauxchaxëë nax wena mea pixãtegüxü, rü ngëmaäcü petaãxëgüxüçax! —ngígürügü. Rü ñuxmachi ga Noemí rü wüxi ga chúxumaxã ngíneãxgüxü irümomë. Natürü ga ngíma ga ngíneãxgü rü ixauxeama. ¹⁰Rü ngígürügügü: —Tama. Rü toma rü tá cuchixüanewa cuwe

taruxĩama —ngĩgürügü. ¹¹Rü ngĩma ga Noemí rü ngĩgürügüchigüãma: —iPewoegu, Pa Chauxacügüx! ¿Taxacüwa chi chowe peruxĩxü? Choma rü marü tagutãma wena chaxãxacü nax wena chaunemaxã pixãtexũcax. ¹²⁻¹³iËcü pechiũcax pewoegu! Choma rü marü chaya rü ngẽmacax taxütãma wena chaxãte. Rü woo chi ñomachitama i chütaxũgu chaxãtegu rü chingĩxgu rü choxũ nangexmagu ya chaunegü ¿rü pema rü chi ípenanguxuxẽegũxũ ñuxmachita nayae nax namaxã pingĩgũxũcax? Rü ngẽma nax ípenanguxuxẽegũgagu rü taguchima pixãtegu. Rü dücax, rü taxucürüwama nixĩ, Pa Chauxacügüx. Rü Cori ya Tupana rü ngúxũ choxũ ningexẽxẽ, natürü yexera chi changechaũ, rü ngúxũ chinge ega chi pexũ chadãuxgu nax ngúxũ pingegũxũ i pemax —ngĩgürügü. ¹⁴Rü ngĩma ga ngĩneaxgü rü wenaxarü ixauxe. Rü düxwa ga Órfa rü ngĩxẽxũ irümoxẽ wüxi ga chúxumaxã, rü ngĩchiũcax itãegu. Natürü ga Rux rü ngĩxẽxũtagutama irüxãũx. ¹⁵Rü yexguma ga Noemí rü Ruxũ ngĩgürügü: —Dücax i ngẽma nai i chaunex rü ngĩchiũcax rü ngĩrü tupanagüçax itãegu. iËcü ngĩwe rüxü! —ngĩgürügü. ¹⁶Natürü ngĩma ga Rux rü ngĩxũ ingãxũga rü ngĩgürügü: —iTaxú i choxũ cucaaxũxũ nax cuxna chixügachixũcax, rü cuxna chatãeguxũcax! Erü ngextã ícuxũxũwa rü ngẽma tá chaxũ, rü ngexta ícupexũwa rü ngẽxma tá chape. Curü ñane rü chorü ñane tá nixĩ, rü yimã curü Tupana, rü chorü Tupana tá nixĩ. ¹⁷Rü ngexta ícuyuxũgu rü ngẽxma tá chayu, rü ngẽxma tá chatax. Rü Cori ya Tupana

choxũ poxcu ega tauta chayuyane cuxna chixügachigu, erü yuxicatama nixĩ i yigüna tüxũ ixĩgachixẽxũ —ngĩgürügü. ¹⁸Rü yexguma Noemí nüxũ cuaxgu ga Rux rü aixcuma ngĩwe nax naxũxchaũxũ, rü marü tama yemamaxã ngĩxũ ichixewe. ¹⁹Rü yemaacü ga yema taxre rü ngĩgümaxã namagu ixĩ, rü ñuxmata Beréüwa nangugü. Rü yexguma Beréügu nachocuxgu, rü guxũma ga yema duũxũgü rü nabaixãchiãegü. Rü yema ñanecüãx ga ngexũgü rü ngĩgürügü: —¿Tama ñnaa iyixĩ i Noemí? —ngĩgürügü. ²⁰Natürü ga ngĩma rü inangãxũ rü ngĩgürügü: —iTaxú i “Noemí” ñaperügü choxũ! iRü name nixĩ i “Mára” ñapegürü choxũ! Erü Tupana ya guxãetüwa ngẽxmacü rü taxũ i guxchaxũ choxna naxã. (Rü ngẽma naéga i Noemí rü Taãxẽcü ñaxũchiga nixĩ. Natürü ngẽma naéga i “Mára” rü Taguma Taãxẽcü ñaxũchiga nixĩ.) ²¹Ãacumexãcuma nua íchaxũxũ, rü ngeãcumexãcuma chatãegu, erü ngẽmaacü nanaxwaxe ya Cori ya Tupana. ¿Rü tüxcüü Noemímaxã choxũ pixu, ega ngẽxguma Cori ya Tupana ya guxũxũma cuacü choxũ poxcuxgu rü ngechaxũ choxna axgu? —ngĩgürügü. ²²Rü yemaacü nixĩ ga Noemí ga Moáanewa natãeguxũ ngĩmaxã ga ngĩneax ga Rux ga Moáanecüãx ixĩcũ. Rü chebádaarü buxuwa nangu ga yexguma Beréüwa nangugü.

Rux rü Boáanewa iyexma

2 ¹Rü Noemí rü ngĩxũ nayexma ga wüxi ga ngĩtanũxũ ga ngĩte ga Erimerétanũxũ ixĩcũ ga Boógu áégacü.

Rü gumá rü wüxi ga diêruãxüchiciü nixĩ rü guxāma nüxü cuácü nixĩ. ²Rü wüxi ga ngunexügu ga Rux rü Noemíxü ngigürügü: —Chebádachitaüwa tá chaxü, rü ngürüächi ngëxma tá nüxü chayangau i wüxi i buxetatanüxü i choxü nadexëxü i ngëma chebáda i nawe iyietanüxü —ngigürügü. Rü yexguma ga Noemí rü ngigürügü ngixü: —Marü name Pa Chauxacüx. iËcü ngëma naxü rü naxü i ngëma nüxü quixuxü! —ngigürügü. ³Rü yexguma ga Rux rü wüxi ga naanewa ixü rü yema buxetatanüxügüwe iyadeetanü ga chebádayaxa ga yéma iyietanüxü. Rü megu ingu yerü yema naane rü Boó ga Erimerétanüxüarü nixĩ. ⁴Rü yexguma Rux yéma yexmayane rü nüma ga Boó rü ínangu ga Beréüwa nax ne naxüxü, rü yema naanewa ínayadau. Rü yema buxetatanüxügüxü narümoxë rü ñanagürü: —iCori ya Tupana pexütawa ngexmax! —ñanagürü. Rü nüma ga buxetatanüxügü rü nanangäxügagü rü ñanagürügü: —iCori ya Tupana cuxü rüngüxëxë! —ñanagürügü. ⁵Rü ñuxmachi ga Boó rü yema buxetatanüxügüeruna naca, rü ñanagürü: —¿Texétanüxü iyixĩ i ngéa paci? —ñanagürü. ⁶Rü nüma ga buxetatanüxügüeru rü nanangäxü rü ñanagürü: —Moánecüãx iyixĩ, rü Noemímax Moánewa ne ixü. ⁷Rü choxna ica nax ngëma buxetatanüxügüwe chebádayaxa nax yadeetanüxüçax. Rü paxmamacürüwa inaxügü nax napuracüxü, rü ñuxmatama nixĩ i paxaächi inangüxü —ñanagürü. ⁸Rü yexguma ga nüma ga Boó rü Ruxü ñanagürü: —Pa Chauxacüx iirüxinü, rü

tama chanaxwaxe i to i naanewa cuyabuxeta! iNuxātama rüxãx natanügu i chauxütaxügü! ⁹iRü ñuxüchi nawe rüxü i ngëma buxetatanüxügü ega ngëxguma nüxü cudauxgu i ngextá nax napuracüexü! Erü marü nüxna chaxāga i ngëma chorü duüxügü nax taxuxüma cuxü chixewexüçax. Rü ngëxguma quitaxawaxgu irü ngëma dexápauügiwa naxü rü ngëma dexá i nüma nayauxgüxüwa naxaxe! —ñanagürü. ¹⁰Rü ngíma ga Rux rü Boópexegu inangücuchi rü nüxna ica, rü ngigürügü: —¿Taxacü chowa cudadu eçax chomaxā cumecümaxü i choma nax to i nachixüanecüãxmare nax chixixü? —ngigürügü. ¹¹Rü nüma ga Boó rü ngixü nangäxü, rü ñanagürü: —Choma rü meama nüxü chacuax ga ñuxäcü ngixü nax cungechaüxü ga cuxé nawena ga cute ga cuxna yucü. Rü ngëxgumarüxü ta meama nüxü chacuax ga tüxna nax quixüxü ga cunatü rü cué, rü curü naane nax nuxā totanügu cuyaxächüxüçax ga woo tama toxü cucuáxü ga cumax. ¹²iRü Tupana cuxü naxütanü i ngëma! iRü nüma ya Cori ya Iraéanecüãxgüarü Tupana ga norü ngüxëçax cudadü cuxü naxütanü naxçax ga guxüma ga yema mexü ga cuxüxü! —ñanagürü. ¹³Rü ngíma rü inangäxü rü ngigürügü: —Cuma rü poraäcü chomaxā cumecümaxüchi, rü ngëma curü ore rü choxü nataäxëxëxë. Erü cuma rü choxü cungechaüäcüma chomaxā quidexa nax woo tama wüxi i cuxütaxü chixixü —ngigürügü. ¹⁴Rü yexguma chibüarü orawa nanguxgu, rü nüma ga Boó rü ngixçax naca ga Rux, rü ñanagürü ngixü: —iNua naxü rü tomaxā

nua nachibü! —ñanagürü. Rü ngĩma ga Rux rü yema buxetatanüxũgütanüwa irüto. Rü nüma ga Boó rü taxũma ga òna ngĩpexegu naxú. Rü ngĩma rü meama ichibü ñuxmata ngĩxú íyaxü. ¹⁵Rü yexguma wenaxarü buxetawa naxĩxgu, rü nüma ga Boó rü norü duũxũgüna naxāga rü ñanagürü: —Marü name nax ngĩma rü ta chebádayaxa ta nadexũ. iRü taxú i ngĩxna peyanuxũxũ! ¹⁶iRü woetama ngĩxcax ngẽma peyayixetanüxẽxẽ nax ngĩma rü yadeetanüāxũcax! iRü taxú i ngĩxna penachuxuxũ! —ñanagürü. ¹⁷Rü ngĩma ga Rux rü Boóanewa chebádayaxa ta ide ñuxmata nachütamare. Rü norü yá ga yema chebáda rü 20 quíruarü yexera nixĩ ga yexguma marü nabuxāxgu. ¹⁸Rü ñuxũchi guma ñanecax itáegu rü íiyangepúxũ ga yema chebáda rü ngĩxẽxũ iyawex. Rü yemawena rü inayaxu ga yema ngĩwemü ga iyaxũxũ rü ngĩxẽ ga Noemína inaxā. ¹⁹Rü ngĩxẽ ga Noemí rü ngĩxna ica, rü ngĩgürügü: —¿Ngextá nixĩ icuyapuracüxũ i ngewax? ¿Rü ngextá nixĩ i muxũ i chebádayaxa ta cudexũ? iRü poraācü Tupana nüxü rüngũxẽxẽ ya yimá duũ ya cuxũ rüngũxẽẽcü! —ngĩgürügü. Rü ngĩma ga Rux rü ngĩxẽxũ ingāxũ rü nüxũ iyaxu ga Boóanewa nax yixĩxũ ga chebádayaxa ta nadexũ. ²⁰Rü ngĩma ga Noemí rü ngĩxũ ingāxũ rü ngĩgürügü: —iTupana nüxü rüngũxẽxẽ ya yimá duũ! Rü nüma ya Tupana rü tamaxā namecüma i ñuxmax rü guma cute ga marü yucümaxā rü ta namecüma. Erü yimá yatü ya Boó rü wüxi i tatanüxũ nixĩ rü ngẽmacax nixĩ i nagu nanguxũ

nax tüxũ nangũxẽẽxũ rü tüxna nadauxũ —ngĩgürügü. ²¹Rü ngĩma ga Rux rü nüxũ iyaxuchigüāma rü ngĩgürügü: —Rü chomaxā nüxũ nixu nax naxũtaxũgümaxā chapuracüxũ ñuxmatáta nagú i buxetaarü puracü —ngĩgürügü. ²²Rü yexguma ga Noemí rü ngĩneaxũ ingāxũ rü ngĩgürügü: —Marü name, Pa Chauxacüx, nax naxũtaxũgüxũ curüngũxẽẽxũ. Rü tama chanaxwaxe i togüanewamare cuxü nax taxuxũma cuxũ chixewexũcax —ngĩgürügü. ²³Rü yemacax ga ngĩma ga Rux rü nawe irüxü ga Boóxũtaxũgü nax chebádayaxa ta nadexũ ñuxmata nagú ga nax yabuxgüāxũ ga chebáda rü trígu. Rü yemaacü ipuracü ga yexguma ngĩxẽ ga Noemíxũtawa nayexmayane.

Boó rü Ruxmaxā namecüma

3 ¹Rü wüxi ga ngunexũgu ga Noemí rü Ruxũ ngĩgürügü: —Pa Chauxacüx, choma rü tá cuxũ naxcax chadau ya wüxi ya cute ya taāxẽ tá cuxna ācü. ²Rü dücax, rü yimá tatanüxü ya Boó ya naxũtawa cupuracücü, rü ñoma i chütaxũgu rü tá naanewa naxü nax ngẽma chebáda íyabuxuchitexexũcax. ³Rü ñuxma rü chanaxwaxe i cunaxü i ngẽma tá cumaxā nüxũ chixuxũ. iRü naxaiya rü cugü napumáraxũne rü nagu icux i ngẽma cuxchiru i rümemaxũ, rü ngẽma naanewa naxü! iNatürü taxũtáma cugü nüxũ cucuaxẽxẽ nax texé quixĩxũ naxũpa nax yanguxũ nax nachibüxũ rü naxaxexũ i nüma i Boó! ⁴iRü mea nangugü nax ngexta yixĩxũ i nacaxũ nax napexũcax! iRü ngẽma ínacaxũwa naxü rü inangegücutü rü ngẽxma naca

nacutüguama! Rü nümatátama nixĩ cumaxā nüxũ yaxuxũ nax taxacü tá cuxüxũ —ngĩgürügü. ⁵Rü ngĩma ga Rux rü Noemíxũ ingāxũ rü ngĩgürügü: —Marü tá chanaxü i guxũma i ngẽma chomaxā nüxũ quixuxũ —ngĩgürügü. ⁶Rü ngĩma ga Rux rü naanewa ixũ, rü inaxü ga guxũma ga yema ngĩxẽ ngĩmaxā nüxũ ixuxũ. ⁷Rü yexguma marü chibüwa yanguxgu ga Boó, rü inachi rü nataāxẽ rü ñuxüchi yexma āuxchitaxũ ga chebádaxütagu nayaca nax yexma napexũcax. Rü yixcamaxũra rü ngĩma ga Rux rü bexma naxcax iyaxũ rü ínangegücutü rü yexma ica. ⁸Rü nüma ga Boó rü ngürüachi ngāxũcuxü pewa nabaixāchi. Rü yexguma nangüeguxgu rü ngĩmaxā nayarüña. Rü nüxũ nicuaxāchi ga wüxi ga nge nacutüwaama yexmaxũ. ⁹Rü ngĩxna naca rü ñanagürü: —¿Texé quixĩ i cumax? —ñanagürü. Rü ngĩma rü inangāxũ rü ngĩgürügü: —Choma nixĩ i Rux, rü cuma nixĩ i chautanüxũxüchi quixixũ. Rü ngẽmacax cugu nangu nax cuxmaxũ choxũ quixixẽxũ ngẽma Tupanaarü mugü nüxũ ixuxürüxũ —ngĩgürügü. ¹⁰Rü yexguma ga nüma ga Boó rü ñanagürü: —iCori ya Tupana cuxũ rüngüxẽxẽ! Rü ñuxmawaxi nixĩ i mea cunangoxẽxũ nax aixcũma nüxũ cungechaũxũ ga guma cute ga marü yucü, erü choxũ cuyaxu cutexũ i choma i cutetanüxũ nax chixixũ. Rü tama naxcax cudau ya wüxi ya cute ya choxũ rüngextüxümaecü ya diëruácü, rü woo tama diëruácü. ¹¹I Rü taxú i cumuũxũ, Pa Chauxacux! Erü guxũma i duũxügü i daa chorü ñanecüāx rü marü nüxũ nacuxxgu rü cuma rü wüxi i nge i mecü

nax quixixũ. Rü ngẽmacax i choma rü tá chanaxü i ngẽma choxna naxcax cucaxũ. ¹²Natürü nangexma i wüxi i guxchaxũ. Rü aixcũma nixĩ i cutanüxũ chixixũ i chomax, natürü nangexma i to i chorü yexera cutanüxũxüchi ixixũ. ¹³iËcü nuxā rüxāxũ i ñoma i chütaxũgu! Rü moxũ paxmama rü tá ngẽma to i cutanüxũmaxā chidexa rü ngoxi cumaxā naxāxmaxchaũ. Rü ngẽxguma nanaxwaxegu nax cumaxā naxāmaxũ rü marü name nax ngẽmaācü yixixũ, erü nüma rü chorü yexera cutanüxũxüchi nixĩ. Natürü ngẽxguma tama nanaxwaxegu, rü Tupanaégagu cumaxā nüxũ chixu nax choma tá cumaxā chaxāmaxũ. iËcü nape rü nuxā ingunexũ! —ñanagürü. ¹⁴Rü ngĩma ga Rux rü yexma ipe, rü Boócutüguama ica rü yexma iyangunexũ. Rü moxũācü taxütáma yangóonexüchigu rü íruda yerü yema ñanagürü ngixũ ga Boó: “Tama chanaxwaxe nax texé nüxũ nacuáxũ i nua chauanewa nax cuxũxũ i chebáda íyabuxuchitexegüxüwa”, ñanagürü. ¹⁵Rü yexguma marü inaxũāchichaxũxgu ga Rux, rü nüma ga Boó rü ñanagürü ngixũ: —iËcü ínacuxuchi i ngẽma curü deyuchiru rü mea nüxũ ingĩ! —ñanagürü. Rü ngĩma ga Rux rü mea nüxũ iyangĩ ga yema ngĩrü deyuchiru, rü nüma ga Boó rü yema ngĩrü deyuchirugu ngixũ nanagü ga 40 quíru naguxũ ga chebáda. Rü ñuxüchi ngixũ narüngüxẽ ga ngítétügu nax naxúnagüpüũāxũ. Rü ngĩma rü yemamaxā ñanecax itáegu. ¹⁶Rü yexguma ngĩxẽxütawa nanguxgu ga Rux, rü ngĩxẽ ngĩxna taca rü ngĩgürügü: —¿Ñuxācü cuxũ nangupetüxũ, Pa

Chauxacüx? —ngĩgürügü. Rü ngĩma ga Rux rü nüxũ iyaxu ga guxũma ga ñuxäcü ngĩxũ nax nangũxẽxũ ga gumá Boó. ¹⁷Rü ñuxüchi ngĩgürügü ta: —Rü choxna nanaxã i guxũma i ñaa chebáda, rü ñuxüchi choxũ ñanagürü: “Tama name i ngeäcumexẽäcũma cuxẽcax cutäegu”, ñanagürü. ¹⁸Rü yexguma ga ngĩma ga Noemí rü ngĩgürügü: —Ñuxma Pa Chauxacüx, rü name nixĩ i mea ícunanguxẽxẽ nax ñuxäcü tá nangupetüxũ i ngẽma cumaxã nüxũ yaxuxũ. Erü nüma ya Boó rü taxütáma nanangexrü ega tama namexẽẽägu i ngẽma cumaxã nüxũ yaxuxũ. Rü nüma rü ñuxmatátama nixĩ i namexẽẽäxũ —ngĩgürügü.

Boó rü Ruxmaxã naxãxmaç

4 ¹Rü nüma ga Boó rü guma ñanearü ücuchicawa nayarüto yerü yéma nixĩ ga guxũma ga duũxũgü nachopetüxũ rü namexẽẽäxũ ga norü guxchaxũgü. Rü yexguma yéma natoyane rü yéma naxüpetü ga guma natanücü ga Boó Ruxmaxã nüxũ yaxucü. Rü nüma ga Boó rü naxcax naca rü ñanagürü nüxũ: —iDücax, nua chauxütawa naxü rü íruto, rü paxaãchi tá tidexagü! —ñanagürü. Rü nüma ga yema natanücü rü yéma naxũ, rü naxütawa nayarüto. ²Rü nüma ga Boó rü naxcax naca ga 10 ga äëxgacügü ga guma ñanecüäx ixĩgüxũ, rü yemagü rü ta ñanatogüxẽxẽ nax nümagü rü ta ñnütanüxü yixĩgüxũcax. ³Rü nüma ga Boó rü gumá natanücüxũ ñanagürü: —Ngẽma Noemí ga Moáanewa táegucü rü namaxã itaxechaũ i ngĩrü naane ga gumá tatanücü ga Erimeréarü ixĩxũ. ⁴Rü

cumaxã nüxũ chixu nax nüxũ cucuáxũcax i ngẽmachiga. Rü ngẽxguma cuxũ nangúchaũgu nax naxcax cutaxexũ rü name nixĩ i ñuxmatama naxcax cutaxe napexewa i ñaa äëxgacügü i ñnütanüxũruxũ ixĩgüxũ. Erü cuma nixĩ i chorü yexera natanücü quixĩxũ ya Erimeré, rü ngẽmacax cuxna naxü nax naxcax cutaxexũ i ngẽma naane. Natürü ngẽxguma cuma tama naxcax cutaxegu, rü ichomaxã nüxũ ixu! Erü choma nixĩ i cuweama chaxüxũ nax choxna naxüxũ i ngẽma naane —ñanagürü. Rü yexguma nüma ga gumá natanücü rü nanangãxũ rü ñanagürü: —Ngẽmáacüx, naxcax chataxe tá —ñanagürü. ⁵Rü yexguma ga Boó rü ñanagürü: —Rü ngẽxguma Noemíxütawa naxcax cutaxegu i ngẽma naane rü cuxna naxü ta nax Ruxmaxã cuxãmaxũ, nax ngẽmaäcü naxãxacüxũcax, rü yimá ngĩne rü tauxeta i ngĩtechicüxü nüxna naxüxũcax i ngẽma naane —ñanagürü. ⁶Rü yemaxũ naxĩnũgu ga guma natanücü rü nanangãxũ rü ñanagürü: —Ega ngẽmaäcü yixĩgu, rü taxuacũma naxcax chataxe, erü chi ngẽxguma naxcax chataxegu rü ngẽma choxna üxũ i naane rü chi ta ngĩnena naxüe. Rü aixcũma cumaxã nüxũ chixu rü icuma naxcax nataxe! —ñanagürü. ⁷Rü woetama nüxcũma nixĩ ga Iraétanüxũgü rü yexguma taxacü ga nüxna üxũ natanüxũna naxãxgu, rü ínacuaxichi ga wüxicutü ga norü chapatu rü yema to ga natanüxũna nanaxã. Rü yemawa nixĩ ga duũxũgüxũ nüxũ nacuaxẽxũ ga aixcũma nügũna nax naxãgüäxũ. ⁸Rü yemacax ga nüma ga Boótanücü rü ínacuaxichi ga wüxicutü ga norü

chapatu rü Boóna nanaxã rü ñanagürü nüxû: —iCuma naxcax nataxe i ngêma naane! —ñanagürü. ⁹Rü yexguma nûma ga Boó rü ñanagürü nüxû ga yema âëxgacügü ga ñüetanüxûruxû ixigûxû, rü yema togü ga yéma irüdaunüxû: —Guxâma i pemagü i ñuxma nua rüdaunüxe, rü pema nixî i nüxû pexînüexû nax choma ngîxû naxcax chataxexû i Noemí i ngêma naane ga Erimeréarü, rü Querióüarü, rü Maróüarü ixîxû. ¹⁰Rü ngëxgumarüxû ta nüxû pexînüe nax ngîxû chayaxuxû i ngêma yutecü i Moáanecüax i Rux nax ngêmaäcû naxâxacüxûcax rü yimá ngîne rü guma tauxeta ngîte ga Maróüchicüxü nüxna naxüxûcax i ngêma naane —ñanagürü. ¹¹Rü nûma ga yema âëxgacügü rü guxûma ga yema duüxûgü ga yéma irüdaunüxû rü nanangâxûga rü ñanagürügü: —Aixcûma toma nixî i nua itarüdaunüxû rü itarüxînüexû. Rü nûma ya Tupana i ñuxma cuxna imucü i ñaa nge, rü tanaxwaxe i ngîxû narüngûxê nax naxâxacüxûcax ngîxrüxû ga Raquéi rü Léa ga ngîwa ne ixîcü i guxâma i yixema i Iraétanüxûgü. Rü cumax, Pa Boóx irü Tupana cuxû rüngûxêxê nax wüxi ya yatü ya duüxûgüpepexewa mecü quixîxû i nua Beréüwa i Efrátawa! ¹²iRü Cori ya Tupana cuxna namugü i muxû i cunegü ngîwa i ñaa nge, rü yamu i cutanüxûgü yexgumarüxû ga nax yamuxû ga nanegü ga guma Fáre ga Yudá nane ixîcü ga Tamáwaücü! —ñanagürügü. ¹³Rü yemaacü nixî ga

Boó rü Ruxmaxã naxâmaxû. Rü Tupana rü ngîxna nanamu ga wüxi ga ngîne. ¹⁴Rü yexguma ga yema ngexûgü ga guma ñanecüâx rü Noemíxû ngîgürügü: —Namecûmaxûchi nixî ya Tupana erü mariü cuxû nanangexmaxêxê ya daa cutaxa. Rü chierü natáchigagu i Iraéanecüâxgütanüwa. ¹⁵Rü nûma tá nixî i cuxû nataâxêxêxêxû rü cuxna nadauxû i ngëxguma cuyaxgu, erü ngêma cuneâx i cuxû ngechaüxûchicü ngîne nixî. Rü ngîma rü cuxû ime i norü yexera ya 7 ya cunegü ega chi ngëxgumaepüx cuxû ngëxmaxgu —ngîgürügü. ¹⁶Rü ngîma ga Noemí rü tüxû iyaxu rü tüxû iyaxêxê ga guxema ngîtaxa. ¹⁷Rü yemaxû nadaugüga ga yema togü ga ngexûgü ga ngîrü ngaicamagu âchiügûxû rü ngîgürügü: —Wüxi ya ngîtaxa ngîxû nabu i Noemí —ngîgürügü. Rü Obégu inaxüégagü. Rü guma Obé nixî ga Ichaí nanatü rü âëxgacü ga Dabíarü oxi ixîcü.

Âëxgacü ga Dabíarü oxigüchiga

¹⁸⁻²²Ñaa oxigü nixî ga Boóarü oxigü ixigûxû: Rü Fáre rü Eróü nanatü tixî, rü Eróü rü Ráü nanatü tixî. Rü Ráü rü Aminadá nanatü tixî, rü Aminadá rü Naachóü nanatü tixî. Rü Naachóü rü Chamóü nanatü tixî, rü Chamóü rü Boó nanatü tixî. Rü Boó rü Obé nanatü tixî, rü guma Obé rü Ichaí nanatü tixî, rü nûma ga Ichaí rü Dabí nanatü tixî.